



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 7

Doval-i joint chiefs of staff mendenbuba
General Milley den ajurutep

Putin-i missile agi amaksü
amokmeren: Boris Johnson



VOL. XX NO. 110 (ADOK 110)

DIMAPUR

RASEMNÜ (WEDNESDAY)

TSÜKLAI (FEBRUARY) 01, 2023

₹ 5.00

Nagaland assembly nungi MLA 2 anenogo

Dimapur, January 31, 2023 (TYO): Nagaland Legislative Assembly Speaker-i 60-Pungro/Kiphire nungi T. Yangseo Sangtam, IND aser 46-Mon Town nung Thongwang Konyak, NDDP nati MLA menden yutsüba agizükogo, ta Nagaland Legislative Assembly

Secretariat-i sangdong ka nung metetdaksü. January 30, 2023 anüngdang nungi tena 13 buba Nagaland Legislative nungi anenogo anungji iba assembly menden ana tazüing kümogo, ta NLA Speaker-isa metetdaksüogo.

NSCN teloktem nem tenokdangba agütsür

Kohima, January 31, 2023 (Agencies): Nagaland nung assembly elections atema mapa inyakba mapang NSCN telok balala nung züngsemtemi prangpong bener mesenzütsü tenokdangba agütsüogo. Ceasefire Supervisory Board ajanga Nagaland nung NSCN telok ajak nem iba

tenokdangba agütsür. NSCN telok ajaki Nagaland nung election tiptema aser ochishia agitsü alizüing atongtsüsa mapa inyaksüla, ta ketdangsur kati ashi. February 1, 2023 nungi tenzüker March 2, 2023 tashi NSCN teloktemi prangpong bener mesenzütsü tenokdangba agütsür.

Dimapur District Control Centre lapokogo

Dimapur, January 31, 2023 (TYO): District Election office Dimapur kübok District Control Centre lapokogo ta Dimapur Deputy Commissioner aser DEO, Sachin Jaiswal IAS-i sangdong ka nung metetdaksü. Anungji nübertemi Dimapur

district kübok Nagaland Legislative Assembly 2023 dak sendakba osangtsüsang Dimapur district control center ajanga metetpelatsü akok, ta paisa ashi. 1950 and 6009082491 For complaints: 03862-248009

Northeast India tatsükba akümer: IMD

Guwahati, January 31, 2023 (Agencies): Mongulbar ase Bodbar anogotem Arunachal Pradesh, Sikkim aser Sub-Himalayan West Bengal kübok tesem kar nung tziunglu arutsü ta IMD-i metetdaksüogo. Kasa mapang Assam, Meghalaya, Mizoram aser Tripura kübok tesem kar nung tziüsü temealatsü, ta IMD-isa ashi. Taruba anogo pungu tziungda Northeast India nung tatsükba akümtsü. Tesüiba ghonda 24 tziungda Arunachal Pradesh, Assam, Meghalaya, Nagaland, Manipur, Mizoram aser Tripura nungbo tziunglu marutsü ta parnoki ashi.

Manipur, Mizoram aser Tripura nung tziunglu maru ta parnokisa ashi. Tesüiba ghonda 24 tziungda Arunachal Pradesh, Assam, Meghalaya, Nagaland, Manipur, Mizoram aser Tripura nung aonung temperatures nung temelenshi maliasü ta Met department-isa metetdaksü. Taruba anogo 5 tziungda Arunachal Pradesh kübok tesem kar nung tziunglu terara arutsü saka Assam, Meghalaya, Nagaland, Manipur, Mizoram aser Tripura nungbo tziunglu marutsü ta parnoki ashi.

Guwahati nung G20 sentong agitsü

Guwahati, January 31, 2023 (Agencies): Guwahati nung February 2, 2023 nungi G20 sentongtem agitsü aser iba atema renemogo. Assam nung mezüingbuba Sustainable Financial Working Group (SFWG) senden aser Youth20 Inception sentong agitsü. India-i küm ka atema G20 presidency abendang item sentong ya agir. Assam nung March aser April itatem ano sentong ana agitsü lir. February 2-3 anogotem Guwahati nung aliba hotel ka nung mezüingbuba SFWG

senden amentsü. Iba senden nung G-20 linüktem, guest nations, international organisations aser Centre sorkar nungi teshimtet nübo 94 adentsü. "India-i pelashishia jaoker. G20 teshimtet nübotem Guwahati airport nung ozü sobaliba sayua pelashishia agizüker. Nenoki Awesome Assam nung amongba teti bilemtettsü" ta Assam chief minister Himanta Biswa Sarma-i tanü metetdaksü. SFWG senden nung session pezü alitsü aser ainertem Brahmaputra River nung cruise aser sobaliba sentongtem nung anir senzütsü.

ECI-i Nagaland elections atema osang sangoktsüogo Nagaland assembly election atema nomination tenzükogogo

Kohima, January 31, 2023 (TYO): Election Commission of India (ECI)-i January 31, 2023 nü 14 buba Nagaland Legislative Assembly elections atema official gazette notification metetdaksüogo. February 27, 2023 nü Nagaland nung constituency 60 prong nung elections agitsü. ECI-i sangdong agütsüba sülen Nagaland Governor Prof Jagdish Mukhi-i Nagaland nung Assembly Constituency ajak nung Legislative Assembly züngsemtem shimtetsü atema metetdaksüogo. Constitution of India nung lateta aliba ama Nagaland Legislative Assembly ya March 12, 2023 tashi mesüra iba jakdang loksatsü akok, ta Nagaland

Governor-isa metetdaksü February 27 nü Nagaland assembly election atema tanü nungi nomination asütsü tenzü kog saka tanü candidate shinga maliasü. February 7 tashi political party aser candidate temi anepdang 9:00 ako nungi nikongdang 3:00 ako tashi nomination papers agütsütsü akok. Iba sülen February 8 nü nomination papers reprangtsü aser February 10 tashi nung tenüing meyipa agitsü akok. February 27 anepdang 7:00 ako nungi nikongdang 4:00 ako tashi polling asütsü aser March 2 nü votes azüingtsü. Nagaland nung vote enoktsür ajak agi 13,17,632 lir. Final electoral rolls nung vote enoker

tasen 24,689 zülusemogo. Nagaland nung voter teimtiba alibaji 4 Ghaspani-1 Assembly constituency lir aser iba constituency nung nisung 74,395 lir. Külen, voters tajemtiba alibaji 27 Mokokchung Town Assembly (8,302) lir. Nagaland kübok polling stations 2,315 nung vote enoktsütsü aser item rongnung 680 (vulnerable) aser 920 (critical) polling stations ta ajiteta lir. Maneni, Nagaland nung model polling stations 57 lenzükjia lir aser polling stations 196 tashi nung tetsürtemi dang ketdangtsütsü. Ano, Persons with Disabilities (PwDs) ajanga polling stations 10 ketdangtsütsü.

Assam Governor-i TB agi shiranger 10 adopt asü

Guwahati, January 31, 2023 (Agencies): Assam Governor Jagdish Mukhi-i Assam nung tuberculosis agi shiranger nisung 10 anepalutsü. Iba ya Centre indang Nikshay Mitra initiative kübok lir aser Governor-i ita trok atema shirangertem nem nutritional aser allied support needs agütsütsü.

Hombarnü Governor Mukhi-i Raj Bhavan nung health ketdangsurtem nem shiranger 10 nem agütsütsü atema food packets agütsü. Pradhan Mantri TB Mukht Bharat Abhiyaan indang Nikshay Mitra initiative kübok kija mesüra teloktemi ita trok atema tuberculosis agi shirangertem

adopt asütsü akok aser parnok nem chiyungtsü aser medical nüingdakbatem agütsütsü. Kecha masüba nisungtemi sorkar sentongtem lokti sentong aka kümdaktsür yaritepa arur anungji India nung the TB eradication mission ya takok tulu angutsü imlar, ta Governor Mukhi-i ashi.

Sen tashi ajanga voters manisatsüla: EO Suboth Singh



January 31, 2023 nü Dimapur atema Expenditure Observer Suboth Singh-i Dimapur DC indang conference hall nung DC & DEO Dimapur aser ROs den külemi Magistrates aser nodal officers den senden ka amenba angur.

Dimapur, January 31, 2023 (TYO): Election Commission of India (ECI)-i Dimapur I, II aser III Assembly Constituency tem nung Expenditure Observer (EO) inyaksü atema Suboth Singh shimogo. 14 buba Nagaland Legislative Assembly indang General Elections nung voters atsür arutsü atema sen tashi mamshitsüla, ta Suboth Singh-i Mongulbarnü metetdaksü. January 31, 2023 nü Dimapur DC & DEO indang conference hall nung FST and SST Dimapur

district Magistrates, VST, VVT officer incharge aser MCMC nodal officer nung den senden ka amendang pai iba ya ashi. Suboth Singh-isa magistrates aser nodal officers dang parnoki tang tashi nung mapa inyaka aruba osang metetpela aser parnok dang election tiptema agitsü atema tebilembatem lemsatepa liasü. Dimapur atema Expenditure Observer (EO)-isa "election ya Festival of Democracy lir anungji voter temi sen tashi melii pei

tangatetba nung vote enoktsütsü atema ketdangsurtemi mapa inyaksüla" ta ayongzüük. Suboth Singh-isa ECI ajanga pa nem agütsüba mobile number 7005155223 lemsatet aser iba nung nodal officers mesüra voter mashi kati mashi mapang nung osang metetpelatsü metetdaksü. Iba senden nung Dimapur DC & DEO, Commissioner Police aser RO Dimapur nungeria elections nung telok balala amalitepa inyaksangshitsü tebilembatem lemsatepa liasü.

Expenditure Observer Kohima tonga aruogo



Expenditure Observer, Samatha Mullamudi den Deputy Commissioner & District Election Officer Kohima, Shanavas C IAA nungertem January 31, 2023 nü Kohima nung tangokba noksa nung angur.

Dimapur, Aenjeti/January 31 (TYO): Tang aruya aliba General Election 2023 mapang 9 Kohima Town, 10 Northern Angami - I aser 11 Northern Angami - II Assembly Constituency tem indang Expenditure Observer,

Samatha Mullamudi, January 31, 2023 nü Kohima tonga aruogo.

La DC & DEO Office Kohima tonga aruba sülen Deputy Commissioner & District Election Officer Kohima, Shanavas C IAS

ajanga district nung election agitsü atema renemshia aliba jenjang metetdakja liasü.

Observer-i DC & DEO indang Office nung amenoka aliba cell balala semdang aser record junga anepalua bendentsü shia liasü.

Peren nung Tobacco Free Awareness sentong agi

Dimapur, Aenjeti/January 31 (TYO): CMO Congerence Hall, Peren nung January 31, 2023 nü "Tobacco Free Awareness Programme" ka agia liasü. Iba sentong nung Dr. Lanuakum, Dy.CMO, Peren ajanga iba campaign nukjidong aser teinyaktsü indang rateta ashi.

Pai iba sentong nung jembidang moko achiba ajanga temang nung timtem balala agütsüba aser nüburtemi amshiba tesemtem, sorkar office aser kidang moko menemba ajanga dangar nem timtem agütsüba indang ashi.

Paisa nüburtemi amshiba tesemtem nung COTPA 2003 indang section 4 kübok moko

nokdangba indanga jembia liasü aser sentong nung adener dang pei temang aser tzi-mopung nem timtem agütsüba nungi pila alitsü ajungshia liasü.

Dr. Lanuakum-i sentong nung adener dang moko machitsü ajungshi aser moko agi yangluba chiyongtsü mamshi tatishitsü tajung aketba nübur kaka akumtsü ayongzüka liasü.

Moko amshiba ajanga nisung temang nung timtem tulu agütsür aser moko ajanga temang nung timtem agütsüba tebilemtsü ya akhi mapang nungi liasü, ta pai ashi.

Paisa mokozi adokba moko oset nungi mezüng pilatsüla aser moko dak sendakba timtem jungjunga samatsü asoshi

lenmang ajak agi moko mamshitsüba ya dang, ta ashi.

Asenoki asen tesüiba memelenshitet saka asenoki tang asen yimyatambo melenshitet, anungji yimya tajung amshitsüla, ta pai ajungmeso.

Paisa shilem agirtem dang moko mamshitsü aser takum nung tobacco mamshiba nung takoker ka-ka akumtsü ayongzüka liasü.

Iba sentong nung menden Dr. Hedungkiebe, DVBO, Peren liasü aser Iraklung Ramlia, HA ajanga melepzüng o jembi.

Iba sentong nung moko machitsü/mamshitsü tezüngzüktep agia liasü aser IEC osettem angati lema liasü.

Mokokchung district nung Farmers' Awareness sentong agi

Dimapur, Aenjeti/January 31 (TYO): Taküm asoshi district nung aluyimba maparen balala tenzüker asünung, Krishi Vigyan Kendra (KVK) Mokokchung nung amenoka aliba Gramin Krishi Mausam Sewa, IMD indang District AgroMet Unit (DAMU) ajanga January 30, 2023 nü Tuli block kübok Anaki Old village nung Farmers' Awareness Programme ka ayongzüka liasü.

Iba sentong ya "Application of AgroMet Advisory Services & Contingency Plan on Agricultural Production" omen nung ajemdaker ayongzüka liasü kong shisalen sayur Dr. Keviletsu Khate, Senior Scientist & Head, Khekali Sema, ACTO (Horticulture),

Martha Chakruno, ACTO (Plant Protection) aser Ningshiyangerla Walling, SMS (Agrometeorology) nungertem liasü.

Iba sentong nung adener dang shisalen sayurtemi alu nungi tajungba züsentetsü asoshi sentong kanga junga yanglutsü ajungshia liasü.

Parnoki alu nungi züsentetba, kiset shiruru, süngjang-lijang wazüka ayuba amala mapa tem züngsang-mopung melenshia aoba den apet inyaktsü, yimtsüng nung mesen aser tashidak jangjatetsü, tsüngkum-mongbo den apet tsünütsü yoktsü, jenjang aketba aonsotsü amshitsü indang sayua liasü.

Ano talisa WhatsApp ajanga

AgroMet Advisory Services (AAS) amshia züngsang-mopung takzütsü indanga parnok dang sayua liasü.

Iba sülen parnok dang Bordeaux mixture renemba, folders-MEGHDOOT ama extension teaching aids tem amshia sayu.

MEGHDOOT ya mobile application ka lir, koba agi aluyimer dang züngsang-mopung den apet aluyimba nung yarir.

Parnoki IMD-Agro AWS, leaflets-Kisan Mobile Advisory Services (KMAS) & AgroMet Advisory Bulletin aser KVK Mokokchung ajanga yanglua aliba YouTube video sayua liasü.


Iba sentong nung aluyimer 38 dena liasü.

DC ajanga Medical Board amentsü metetdaksür

Dimapur, Aenjeti/January 31 (TYO): 14th Nagaland Legislative Assembly asoshi aruya aliba General Election mechi Medical Board senden ka February 4, 2023 anepdang 10:00 ako nungi tenzüka ADC Planning Office, Mokokchung nung amentsü, anungji medical ground nung cases tejanga kar

exemption aginüra, applicant tem temang reprangdaksütsü asoshi shia aliba anogo Medical Board dangi arutsü metetdaksür, ta Deputy Commissioner & District Election Officer, Mokokchung, Shashank Pratap Singh, IAS ajanga sangdong ka nung metetdaksü.

Nagaland sorkar aser Patanjali Foods Ltd. tsüngta MoU zülutep



Kohima, Aenjeti/January 31 (TYO): State nung NMEO -OP (National Mission on Edible Oil - Oil Palm) kübok Oil Palm Plantations atema MoU ka Government of Nagaland aser Patanjali Foods Ltd tsüngta zülutepa liasü.

Patanjali Foods Ltd ajanga iba MoU ya January 31, 2023 nü Director of Agriculture, Govt. of Nagaland den zülutepa liasü. Iba MoU kübok state nung Oil Palm ajungkettsü asoshi sentong balala amshitsü aser Oil Palm atema Oil Mill amenoktsü.

Patanjali Foods Ltd ya August 2022 mapang Patanjali Foods Ltd ajanga East Siang District kübok Niglok nung Oil Mill amenoktsü atema nungshilong azünga liasü. Ano Mizoram nunga Langthlai district kübok Lepah fiscal 2021-22 mapang sen crore 24000 dak tema aazüka amenoktsü sentong lir.

liasü aser parnok nem Zone II lemzüksü, kong Mokokchung, Longleng aser Mon district tem lir.

Department ajanga tawa EOI ka sangdongba nung item district nung Oil Palm adoktsü nükla tajung lir ta shia lir.

Patanjali Foods Ltd ya Mizoram, Arunachal Pradesh, Assam aser Tripura state tem nung mapa inyak tenzükgoko. August 2022 mapang Patanjali Foods Ltd ajanga East Siang District kübok Niglok nung Oil Mill amenoktsü atema nungshilong azünga liasü.

Ano Mizoram nunga Langthlai district kübok Lepah fiscal 2021-22 mapang sen crore 24000 dak tema aazüka amenoktsü sentong lir.



Mapang balala nung apuba Indian Made Foreign Liquor (IMFL) aika Mokokchung nung January 28, 2023 nü raksa indoka liasü. Item rongnung Mc Rum case 200 dak tema, Cane Beer cases 14, AC Black whisky case ka liasü. Item temesepba yi ya SDO(C), Mokokchung; SDPO, Mokokchung; Assistant Public Prosecutor, Mokokchung; Prosecuting Inspector, Mokokchung aser NGOs nungi teshimtet nisungtem lia raksa indoka liasü.

METETDAKTSÜR

ABAM Book of the year Award Aor kaket kenozülubalala; Arogo aser Lokti anaperongla asoshi zülubatem nungi küm shia tajungtiba Award agütsütsü.

I. Kaket shimyim yamai alitsü:

1. Kaket tezülur shisatsü nungi atokba (Original) asütsüla.
2. Kaket zülü nung asalentong tasen (Creativity) aketba.
3. Kaket züluyim shitak (Methodology) amshitetba.
4. Tapu aser pongtem züluba nungi tarensen (consistency) shitak amshitetba.
5. Tazüngertem tajangzük katetsüsa (Utility) züluba.
6. Tapak 100 tema züluba kaket asütsüla.

II. Kaket züluba Oshi: Ao aser English nung züluba nungi ka-ka shimtsü.

III. Tezülur shimba nung adenba: Iba Award shimba nung shibaisa adentsü mulungdir, pei züluba kaketji copy asem (3) kaket adokli tekaraba nung Mungdang nem agütsütsü. Iba kaket ABAM meyong asütsü. Panel of Judge-i kechi kaket shimdir, Sempetji ABAM Küm Tatem Mungdang nung agütsütsü.

(REV. DR. MAR PONGENER)
Executive Secretary, ABAM.

(DR. MOANUNGSANG)
Secretary, Lit., & Education, ABAM

भारतीय उद्यमिता संस्थान
Indian Institute of Entrepreneurship
BASISHA CHARALI LALMATI, 37, NATIONAL HIGHWAY BYPASS,
GUWAHATI-781029 (ASSAM) Tel: 0361- 2300840 & 6901271181;
Tele Fax: 0361-2300325/2305394

NOTICE OF POSTPONEMENT

With reference to the press release issued to several newspapers of Nagaland on 20 January 2023 on Business Idea Contest and Entrepreneurship Development Programme in Nagaland, IIE hereby postpone the programmes until further notification, keeping in view the code of conduct imposed due to the upcoming Nagaland State Assembly Elections.

Sd/-
Administrative Officer, IIE

Doval-i joint chiefs of staff mendenbuba General Milley den ajurutep

New Delhi, Aenjeti/January 31 (Agencies): National Security Advisor Ajit K Doval-i Joint Chiefs of Staff indang US mendenbuba General Mark Milley den ajurutepa India aser US na tsüingda tesendaktep dak sendakba nung sensaksem kaogo.

Doval aser Milley na Hombarnü US dangi India Ambassador Taranjit Singh Sandhu indang official residence; India House nung senden mena liasü.

"Joint Chiefs of Staff mendenbuba General Mark Milley-i tanü NSA Ajit Doval den ajurutepa India aser US na tesendaktep dak sendakba nung

sensaksem kaogo," ta Indian embassy-i tweet asü. Iba sülen nikongtsütsü Sandhu-i Doval tenüing nung sentong ka ayongzük, shiba India-US Initiative on Critical and Emerging Technologies (iCET) senden mezüingbuba nung shilem agitsü atema India nung den delegate den Washington-i oa lir.

Iba sentong nung US National Security Advisor Jake Sullivan, Commerce Secretary Gina Raimondo, Deputy Secretary of State Wendy Sherman, National Science Foundation Director Sethuraman Panchanathan; NASA Administrator Bill

Nelson nung den Western Digital & Qualcomm tir aser Google densema US industry züingsem aikati iba reception nung shilem agi.

India nungi Corporate lenirtem rongnung Tata Sons, Bharti Enterprises, L&T, Bharat Forge, Reliance Jio, Adani Defence, Mahindra & Mahindra aser Arcelor Mittal nung den semasa liasü aser India nungi startups balala lenirtemia shilem agia liasü.

Startups tem rongnung Dhruva Space, Digan-tara (space tracking), Pixxel (satellite imagery), 3rdi Tec (communication), Q Pi-Ai(AI & Quantum) aser Saankhya Labs

Forum tir den Western Digital & Qualcomm tir aser Google densema US industry züingsem aikati iba reception nung shilem agi.

India nungi Corporate lenirtem rongnung Tata Sons, Bharti Enterprises, L&T, Bharat Forge, Reliance Jio, Adani Defence, Mahindra & Mahindra aser Arcelor Mittal nung den semasa liasü aser India nungi startups balala lenirtemia shilem agia liasü.

Startups tem rongnung Dhruva Space, Digan-tara (space tracking), Pixxel (satellite imagery), 3rdi Tec (communication), Q Pi-Ai(AI & Quantum) aser Saankhya Labs

(wireless communication) nungi lenirtem densema liasü.

Taoba küm May ita Tokyo nung US tir Joe Biden aser Indian Ato Kilonser Narendra Modi na sensaksemba mapang sangdongba sülen iCET ya linük anaprongla nungi National Security Councils lenisüba nung inyaksangshir.

iCET ya US aser India na technology tem dak sendakba nung tesendaktep akangshitsü asoshi rangloker lir aser iba ajanga alima terenlok nung teyari agütsütsü aser iba den linük ana rongsenketzüing ajungkettsü aser national security tejangrabatem kümzüka ayutsü.

Visakhapatnam ya Andhra Pradesh capital akümtsü: CM Reddy

New Delhi, Aenjeti/January 31 (Agencies): Andhra Pradesh chief minister YS Jagan Mohan Reddy-i Mongolbarnü, state yimtiba ya Visakhapatnam-i belener aotsü, ta ashiba den March ita mezüingbuba hopta agitsü aliba Global Investment Summit (GIS)-i investor tem jaoka liasü.

"Ni nenok Visakhapatnam-i jaoktsü atema aru, koba state yimtiba akümtsü. Nia taruba ita ishika tsüingda Visakhapatnam-i aotsü," ta pai investor tem dang senden ka nung ashi.

Andhra Pradesh high court-i state sorkar dang Amaravati nung mapa 2023 küm March ita tashi nung tembanga inyaksü atema tetuyuba agütsüba sota atatsü atema Supreme Court-i tetuyuba agütsüba sülen ita pezü lir tang iba osang sangdongogo.

Taoba küm March ita Andhra Pradesh high court-i, state nung capital asem amenoktsü sentong

aliba anema obendanga agüja, Amaravati ya state yimtiba ama renlokyonga aotsü atema sorkar nem tetuyuba agüja liasü.

2015 küm state chief minister N Chandrababu Naidu-i (iba mapang CM), Amaravati ya state yimtiba asütsü ta sangdong aser yimti tasen yanglutsü atema aluyimertem dang nung ali acre 33,000 alizük. Iba yimti tasenba ya Singapore model nung yanglutsü ta Naidu-i tenangzükba agüja liasü.

2013-2014 küm Andhra Pradesh nungi Telangana jakzüka aoba sülen state yimtiba Hyderabad ya Telangana nung densematokba ajanga capital makai aküm. Andhra-Telangana Reorganization Act kübok centre-i state yimtiba tasen ka yangertsü atema Andhra Pradesh nem senotsü teperi agütsütsü tenangzükba agüja lir.

2019 küm CM mendeni atuba sülen CM Jagan Reddy-i, state nung capital asem amenoktsü

sentong aliba sangdonga liasü. Capital asem ya Amaravati; legislative capital, Visakhapatnam; administrative capital aser Kurnool; judicial capital asütsü shima liasü.

2020 küm Andhra Pradesh legislative assembly-i, capital asem yangertsü atema Andhra Pradesh Decentralisation and Inclusive Development of All Regions Act, 2020 agizüka liasü

Iba ozüing tasenba ya Rajadhani Rythu Parirakshana Samiti kübok Amaravati nung aluyimertem anema liasü aser parnoki ashiba agi, Amaravati ya full-fledged state capital kümdaktsütsü ta nangzükker sorkari parnok ali alizüka liasü.

Parnoki Andhra Pradesh high court nung ken o ka benok aser okadak ken o aiben angadanga sülen state sorkar dang Amaravati nung mapa ajak 2023 küm March ita tashi nungbo tembanga inyaksü tetuyuba agüja liasü.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
POSSESSION NOTICE

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules 2002 section 13(12) aser Rule 3 nung tashi agüja aliba dak ajemdaker State Bank of India Authorised officer-i07.06.2019 nü Demand Notice ka agütsür aser sen apur **Shri K Iphoto Shohe, Proprietor of M/s. I K Shohe Enterprise aser Smt. Vitoli Iphoto Shohe, Guarantor of M/s. I K Shohe Enterprise** dang iba osang agizüka sülen anogo 60 tsüingda parnoki apua aliba sen 1,98,47,742.00 (Rupees One Crore Ninety Eight Lacs Fourty Seven Thousands Seven Hundred Fourty Two only) aotsü metdaksür.

Sen apuri sentsüh maotet nung, Borrower/Guarantor aser nüburtem dang, tashi agüja aliba ketdangsüri iba Act Section 13(4) aser **Rule 8** nung tashi agüja aliba amshia teküboklen agüja aliba kiojentem 2023 küm January 27 nü agiba metdaksür.

Borrower/Guarantor aser nüburtem dang iba kiojen dak sendakba nung kechia inyaksangshi masütsü metdaksür aser karidanga tetuyuba anema inyakra parnoki State Bank of India-i sen 1,98,47,742.00 den 08.06.2019 nungi tenzüka tetemlok meshitsü. Act section 13 kübok sub-section (8) provisions dak ajemdaker atakzükja aliba mapang tsüingda kiojentem meyipa agitsü atema sen apurtem jaoker.

Kiojen osang tejangja

Smt. Vitoli Iphoto Shohe tenüing nung aliba Block Thilixu Village, Mouza No.3, House No.271 Lane No.12, Dimapur, Nagaland kübok Dag No.F/5 Patta No.94, agi ayimjema aliba ali Bigha 3 den RCC Buildings 2, Assam type Building ka, arrtsü atsü aser tanga kiojentem densema lir.

Arrtsü yamai alitsü:
On the North by Approach Road,
On the South by Land of Shri Hevishe,
On the East by Approach Road,
On the West by Land of Shri Nihovi.

DATE : 27.01.2023 AUTHORIZED Officer
PLACE : Dimapur (State Bank of India, SARB Jorhat Branch)



पंजाब नैशनल बैंक
punjab national bank
(A Govt. of India Undertaking)

Zonal SASTRA Centre
1st Floor, UBI Building, Hem Barua Road, Pan Bazar, Guwahati, Pin-781001
Email: zs8346@pnb.co.in

KIOJEN AYOKTSÜ
ATEMA NOTICE

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 Rule 8 (6) dak ajemdaker kiojen ayoktsüba indang E-Auction Sale Notice agütsür. Sen apur aser guarantor (s) temi sen apuba maoteti aliba meyipa agitsü atema Bank/ Secured Creditor temi teküboklen table nung agüja aliba date dak ajemdaker tashi agüja aliba Officer of the Bank/ Secured Creditor temi agir aliba kiojen tem kodang südir süang, kechi südir süang aser kechisa lidri aji ayoktsü atema nüburtem aser talisa sen apur aser Guarantor tem nem osang agütsür. Kiojen tem dak sendakba nung teküboklen table nung shisema aliba jenjang aser earnest money deposit koma ali yamaji dang asütsü.

Lot. No.	Name of the Branch	Name of the Account	Description of the Immovable Properties Mortgaged/ Owner's Name (mortgagers of property(ies))	SCHEDULE OF THE SECURED ASSETS			Details of the encumbrances known to the secured creditors
				A) Dt. of Demand Notice u/s 13(2) of SARFAESI ACT 2002	B) Outstanding Amount	C) Possession Date u/s 13(4) of SARFAESI ACT 2002	
1	Dimapur Branch (449800)	M/s New Tech Steel & Alloys Private Limited	Equitable Mortgage of all that part and parcel of the land measuring 5 Bighas covered by K.P. Patta No-169 under Dag No-375/178, 376/179, 377/228, which is butted and bounded as under- at North- Plot of Shri Sohanlal Jain, at South- Mini Road and then Gandhi Workshop, at East- N.H. No-39, at west- Land of Shri Chandra singh Tokbi and Land measuring 5 Bighas covered by K.P. Patta No-279, under Dag No-62, which is butted and bounded as under- at North- Suraj Devi, at south-Kisan Lal Murari, at East- NH-39, at west- Chandra Takbi, all amounting to more or less measuring total area 10 Bighas owned by Shri Shiv Narayan Choudhury and Factory Building, Sheds, Civil Construction sheds and Plant & Machinery along with Foundation works in the name of M/s New Tech Steel & Alloys Private Limited situated at Village- Khatkhathi Nonke, Mouza- Borjan, Po- Khatkhathi, PS- Khatkhathi, Dist- Karbi Anglong, Assam.	A) 28.04.2017 B) Rs. 38,95,63,341.56/- as on 31.03.2017 plus further interest wef 01.12.2016 and other charges thereon C) 22.08.2022 D) Symbolic Possession	A) Rs. 922 Lacs B) Rs. 92.20 Lacs (23.02.2023 upto 4 P.M) C) Rs. 0.50 Lac	Date: 24.02.2023 Time: From 11:00 AM to 04:00 PM	Not known
2	Dimapur Branch (449800)	M/s New Tech Steel & Alloys Private Limited	Equitable Mortgage of all that part and parcel of a plot of land measuring 01 Bigha and 09 Lechas covered by Dag No-624 and 625, Patta No-430 with a Pucca R.C.C. Building consisting of ground, first and second floor with all proper sanitation and electrification situated at Block No-4, Dimapur Town, Middle Point Colony, Circular Road, Dimapur in the state of Nagaland owned by Smt. Vitoni Sumi, which is butted and bounded as under- by North- Circular Road, by South- Land of Shri N. Jakhalu, by East- Land of Shri Tokugha Sumi, by West- Land of Shri Hokugha Zhimomi (Description as per sale Deed No- 1043/2008 dated 18-09-2008)	A) 28.04.2017 B) Rs. 38,95,63,341.56/- as on 31.03.2017 plus further interest wef 01.12.2016 and other charges thereon C) 22.08.2022 D) Symbolic Possession	A) Rs. 620 Lacs B) Rs. 62.00 Lacs (23.02.2023 upto 4 P.M) C) Rs. 0.50 Lac	Date: 24.02.2023 Time: From 11:00 AM to 04:00 PM	Not known

TERMS AND CONDITIONS:

Yokyatsüya ya Security Interest (Enforcement) Rules 2002 aser teküboklen agüja aliba conditions tem dak ajemdaker masütsü

- Kiojentem ya "AS IS WHERE IS BASIS" aser "AS IS WHAT IS BASIS" aser "WHATEVER THERE IS BASIS" dak ajemdaker ayoktsü.
- Schedule nung shisema aliba kiojen agir alibatem ya Authorised Officer-i takokba tashi osang bendener agütsüogo, saka osang sangdongba mapang aibelen mesüra osang tai agütsüba mesüra zütokbatem atema Authorised Officer-i telangzüba magütsütsü.
- Yokyatsüya ya Website <https://www.msstcecommerce.com> nung agüja aliba e-auction platform ajanga 24.02.2023 nü @ 11:00 AM nung tashi agüja aliba ketdangsüri ayoktsü.
- Yokyatsüya dak sendakba nung osang tejangjaba agitsü atema <https://www.ibapi.in>, <http://www.msstcecommerce.com/>, <https://eprocure.gov.in/publish/app> & www.pnbndia.in semdangang. **Authorized Officer Punjab National Bank, Secured Creditor**

Date: 30.01.2023, Place: Guwahati



TIR YIMYIM

YIMOBILEM (EDITORIAL)

DIMAPUR RASEMNÜ, TSÜKLAI(FEBRUARY) 01, 2022

Rahul'er yatra ajanga Congress asentenshitsu asü?

- P Tiamongba Aier

Srinagar nung aliba Lal Chowk nung Rahul Gandhi-i linük wako salaa Bharat Jodo Yatra temogo. Anogo 135 tashi iba Yatra yagi state 14 adena senzüogo aser iba ajanga yimtenren tsütsü Congress-i jenjang tajungba amentetogo ta ajiteter. Yaküm Rahul Gandhi-i iba sentong tenzüker agia arudang nübortemi iba sentong tali meteta aküm aser Rahul-i T-shirt temesüng ka asema mesüra pa bangsemo ainba mesüra anogo shia ka nung kilometer 20 tema jajaba indang osangtem kanga metetnua ngalashilaogo. Iba sentong agidang Rahul-i tamburtem, tetsürtem aser tanurtem den ajurutepa sensaksemba, osangbener den jembiba mesüra BJP anema osang prokba nübortemi kanga sapua osang metetpela aruogo. Bharat Jodo Yatra ajanga Congress telok indang inyaksangshi tajung kanga junga sayuogo, parnoki mapa inyakba dang masü saka social media nunga osang kanga junga prokshia liasü. Iba sentong ajanga Rahul tenüng tajung yanglutetogo saka ibaji taküm state 9 nung assembly elections ajanga sayutsü. 2024 Lok Sabha elections atema taküm assembly elections ya semi-final ka ama züngshir aser atangji Rahul'er sentong ajanga nübortem atsür arua lira Congress jenjang tajungba akümstsü. State 9 nung assembly elections osang ajanga iba yatra ya Gandhi'er kibong indang sentong ka dang mesüra Congress asentenshiba sentong ka kuli agütsütsü. Rahul Gandhi-i September 7, 2022 nü Kanyakumari nungi tenzüker January 30, 2023 nü Kashmir nung tembangba sentong ajanga kechi tajangzük angu ta mongin nisungtem dang asüngdangtep dang, parnoki Rahul indang bangsemo ta langzü. Bangsemo ajanga Rahul nem tebilemstsü khuret tuluba agütsüogo. Pa tain ka ama shilangogo aser pa ya joko Indira Gandhi'er semchir mesüra Rajiv Gandhi'er jabaso masü saka Rahul Gandhi lir ta mongin nisungtemi ashir. Anungji Rahul Gandhi-i tesüiba dang nung shisa takaba aser tasütaitba nung Congress shia arutsü len anitsüla ta bilemer. Congress-i Rajasthan aser Chhattisgarh nung sorkar menden metoktsütsüla kechiyong Himachal sülenbo Congress-i yimsü asüba state ana ya dang lir. Ano Congress-isa tanga state tem nung takok tajungba angutsü merangba den külemi Karnataka aser Madhya Pradesh nung sorkar atsüngdoktsü aser Telangana nung sorkar akümstsü merangtsüla. Iba yatra agia arudang linük nung sensotem indang khuret aser tebilemstsü aika metetogo anungji itemji election atema nüboyimba nung amshitsüla. BJP-ibo Bharat Jodo Yatra ya len maliba sentong ka ta aitsüogo, anungji Rahul Gandhi aser Congress tir Mallikarjun Kharge nati ibaji masüa ta asütsüa mapa inyaksüla. 2024 general elections matongdang tanga opposition party temi Congress dak yenük yoktsü kechiyong Srinagar nung Bharat Jodo Yatra tembangba sentong nung opposition party 21 tashi jaoka liasü. Anungji iba yatra agiba sülen Congress asoshi tebilemstsü khuret tulu ka lir. India nung political party tejentiba aser mezüng sorkar küma linük renlok daktsürtem ta asüba tenüng amer ano linük nung temelenshi tajung kar bener arutsü atema asentenshitsu mapang ka tongogo.

OLEMSABANG

AZÜMESEN ASER LALUSHIPONGBA AGI KIBONG SENAK TIA-i YIDAKTSÜR

- L. Kika Pongener

(Yashi adok nungi...)

Ajisuaka, asen Naga nung tetsütem aika anogo tepiyong kidang mamen telok-tenji nungdak-nungra nung dang mapang endoka senzür, karbo nungdak makaba nung kipoksema senzür, karbo anogo tepiyong T.V. nung Serial repranga kazüteper, karbo Mobile Phone ammer anogo tepiyong mapang endoker, karbo sen bushiba luyim (Business) nung dang mapang ajak endoker, ano sempet tajung aketer karbo ken bushiba aser sarasadema senzüba nung anogo mapang ajak endoker. Ajiser, pei jala-jabaso school/college senshir kidangi shilangdang tetsütem kidang maliba agi chirnurtem kima-yimdong nung seplepa senzütsü mapang agutsür, ano tia makar karbo yi lar/mozü lar küma oa taküm raksadaktsür. Atangji, tetsütem aikati mapang aser sempet tamshi mashiba ajanga kibong sensak tiai aiba aser chirnur taküm raksadaktsüba aika lir. Tesasatsüka, tetsütem aikati alima aser loktiliba-bo ajangzük daktsü, senotsübo aika ajangzüka bener aru, saka pei kibongbo majangzük, chirnurtem ajunga raksadaktsüba tetsütem aika lir. Tetsütem aikati alima aser loktiliba-bo ajangzüktsür pei kibongbo sendokra takoksa ulura asütsü, aser iba raksabaji kodanga meyipa bener marutettsü. Tanü tetsütem aikati pei jala-jabaso tangar nem 'fees' tasak aguja duition agidaktsübaji konang ka amai, aser 'Fashion' ka amai kanga numadanga jembiteper, saka idangji tanem-tanemi kibong sensak tiai ayir ta memeteter. Ano tetsütem aikati kibong 'Budget' meyangluba agi kinungburi bener aruba senotsü tim teintoktsü lenmang nung masü, saka meintoktsü lenmang nungang teimba endokba agi sensak tiai ayir. Kibong kaji tular-takar asütsü akok, mesura tilar-sensaker ka dang asütsü akok, saka rongsenkettsüng nung kangabo timtem meli-i alitsü atema kinungtsürtemi kibong 'Budget' kanga junga yanglutsüla. Tatishitsü agi...Tetsütem kar bazari jang-otsü, metsü-mersu, totzü-sapon aser nungdakba osettsüset alitsü aoba sernung 'Second Hand' suoshi, mesura tanga osettsüset-ang kar langlanga denjiba agi aji-ang alirbo nungdakba oset-tobo kecha mali ser kidangi meyipa shilanger, aser joko tangar dang sen apoh-er nungdakba osettemji alitsüsa akümer, aser ibajagi sentsüh talila tsühloker. Anungji akok tashi kinungtsürtemi pei tashi apir kibong 'Budget' yanglutsüla.

Ano tanü putu nung, asen Naga nung balaka tular-tilar/takar-sensaker ajunga Gari yur jangradema liteper. Aji oda Gari nung mener senzübaji jangratemtsüka, tobur-a kanga tajung aser tangar-ia kanga akümketa repranger. Aji oda, tanü putu nung Gari-ji 'Luxurious' oset ka masü, saka kangasa nungdakba oset ka kümogo, saka ano Gari-ji maintain asütsü atema itasen dak alaka tanga 'income' lenmang kar melira kibong ajakibo memesutettsü sudi. Anungji Gari akaba jagi asen kibong tajangzük asü takoksa tuluba (?)...ta asadangtsüla. Ita shia anguba 'income' nungi kibong nungdak perir külen Gari-ji mesutettsüsa (Maintain) senotsü anunger asü manunger (?) Gari akaba ajanga anogo shia sen tajangzük kwi bener arur (?) Mesura Gari dakji anogo nung/ita nung sen kwi endoker (?)...ta kanga junga asadangtsüla. Tanü putu nung asen Naga nung ajunga Gari akaba agi kiyonger/kidanger kidangi lenmang tatsüka aotsüa tetsüng agi mejajai Gari nung dang senzüteper. Naga nung aikati tetsüng agi lenmang tatsüka jajatsübajia maaksu ka amai bilemer, mesura jenjang alur amai bilemer, saka nungdak kanga maliba nung Gari bener senzüdang Petrol/Diesel nung sen kwika endoker ajibo meshisadanger. Petrol/Diesel nung jenjangbo anogo shia tujen atur, ano lenmang lemjem/süngaküm (Gate) shia tema-telung sorkar telok-telok saru-sajir/kati-karar zünraba agi osettsüset ajak nung jenjangbo tupet atur, aser idangji tilartem balaka itasen tila agi Gari nung totzü shioktsü asü (?) Apen-suoshi aser chiyungtsü alitsü asü (?) Chirnur school/college fees agutsütsü (?)...ta meshitetba timtem aika lir. Aji oda, itasen achirtema yamaji timtema alinungbo, tanü poksünga aayanga alirtembo kodaka timtema alitsü...??? Asen Naga nung balaka, chiyunga-ajemba, apen-suoshi suboba aser libaliroba ajak nung takar-tular/tilar-sensaker kecha tebandang mali, libalirotepba ajanga tilar/sensaker kibong aika sensak tali atener. Kibong karbo pei tashi dak alia, tular-takar jilo benschidang, sentsüh yong pei telidak ki dena tangar nem agidaktsüba aser shibangdaktsüba-a denjia aruogo.

(Maneni asüng adok nungi...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Sri Lanka taoba tir Sirisena-i 2009 Easter Sunday bomb lendong atema tatok meshi



Sri Lanka, April 21, 2019 anogo nung bomb lendong tesashi ajanga St. Sebastian's Church raksatsüba noksa nung angur.

Colombo, Aenjeti/January 31 (Agencies): 2019 küm Easter Sunday bomb lendong tesashi atalokba atema Sri Lanka indang taoba tir Maithripala Sirisena-i Mongulbarnü linük nung nütüsung tajemba Catholic kin dang tatok meshia liasü. Iba lendong nung India nunger 11 densema nisung 270 dak tema asü.

Sri Lanka nung aliba Islamist yimsü akhanga amshiba aser ISIS den sendaktepa aliba telok, National Thawheed Jamaat (NTJ) ajanga April 21, 2019 nü bomb tesashi aika pokdakja Catholic nunger tenlaki asem aser hotel tajung kar poksatsü aser iba mapang nisung 270 dak tema asü aser 500 dak tali yirua liasü.

Iba bomb lendong yagi yimtenren anakshitsü aser iba

mapang tir inyaka alisang Sirisena aser ato kilonser inyaka alisang Ranil Wickremesinghe nati jelia itdangiter osang angazükaka iba lendong menokdangtet ta tenüng sena liasü.

"Dangar temi langka inyakba atema ni Catholic nunger dang tatok meshir," ta Colombo nung par Freedom Party den jembidang ashi.

Supreme Court ajanga January 12 nü pa dang iba lendong ajurua alirtem nem sen million SLRs 100 agütsütsü totuyuba agütsüba sülen pai tatok meshir. Pai iba sen ya magütsütetra pa 'contempt of court' ken o nung tepuokdaki yoktsü.

Sirisena ya Sri Lanka tir ka ama 2015 nungi 2019 tashi inyaka liasü aser pai 2024 nung tir election agitsü aliba nunga tokteptsü, ta ashi.

Asür tem kinunger, Catholic putir aser okatsür temi tentetba Bar Association of Sri Lanka densema petitioner 12-i iba mapa tir inyaka alisangi lendong nungi jenbutsü asoshi mera magiba atema fundamental rights petition agüja lir.

Iba lendong atalokba sülen Sirisena-i shimtetba presidential panel of inquiry ajanga iba mapang tir inyaka alidangi lendong menokdangtetba aibelen bushitet.

Ajisüaka Sirisena-i item taitüba nung aibelena mali, ta ashi.

Yangji aliba Catholic Church nung tekolakba, Malcolm Cardinal Ranjith-i iba ken o bushisüngdangba nung temolung masüba maneni lemsateper aser bushisüngdang ya tema-tazütsü ka dang ta ashir.

ANOGO ABEN TSÜNGREM DEN

Sarasadem aser jakla

"Kodang Mosa Sinai tenem nung Tsüngrem den jembir alu, pa tejak tekepji sentsüpranga liasü"- Anitet 34:29.

Taküm indang aser Tsüngrem indang angatetsü asoshi sarasadem tenem nung tanela tenük atangji lapoktsür. Idakji ali shi indang bilemba jangjatsür aser Tsüngremi mapa inyaker ta asenoki angur. Shirnoki talangbai atur parnoki talangba, tesatempa angur. Shirnoki talangbai atur parnoki tejangjaba angur ta ashibaji shidak. Shirnoki sarasadem tenem talangbai atur parnoki tejangjaba aser talangba angur. Teküpboklen lenden nung mepet aser Tzüsü ateta alima mapa aser Kotaker mapa chichiba tesangwa nung jangjaa angur.

Atangji shirnoki maneni miim sarasadem alir parnok jakla melenshiba nung sayur. Sarasadem mesüi aliba mapang nung manguba tejak maneni sarasademba taküm tejak angutsü. Khristan kar tatsüzükba tashi nungi pilaa temaleni metura aser memelenshira ibai kecha agia masü saka pa/lai sarasadem tenemi matuba ajanga lir. Sarasadem tenemi matuba tetezü Tsüngrem den telungjem makaba. Tsüngrem den telungjem makaba ajanga temeshiba tebur tajungji mangur.

Mosa anogo lir nü Sinai tenem nung Tsüngrem den telungjem liasü aser pa tejak melenshir nübur dangi alu. Taseen Lai nung Stepen, sarasademba taküm, Tanela Temeshi agi asüngba nisung pa tsükchir, Yihuda nungeri pa tejak "kotak tenyar tejak" ama angu. Asen Kibubai sentsü melenba tenem nung sarasadem aser Pa sarasadem dang pa tejak melenshi.

Itemji sarasadem agi telunglen melenshiba tema nung sayuba lir. Ano Mosa indang bilemdangang-alima nung nisung ajak rongnung Mosa ajemalutiba liasü. Stepeni ashiba shisadangang- "Kibuba iba temenen parnok dak tebenloktsü."

Shirnoki miima Yisu den mapang tali agir, item taküm nung teti Yisu mesüka ainba, aser pa tebur tajung adokdaksüba alitsü. Küm taseen iba sentsü melenba adokdakja aintsü maneni Kibuba Yisu den mapang agia jajatsü merangdi.

NE Nigeria nung pastor ka aser Delta nung Khristan ana tepset

Abuja, Aenjeti/January 31 (Agencies): Northeast Nigeria nung January 26 nü arogo ka indang pastor tepset aser linük south tsütsü Khristanpur anema azüdokshiba manener, kong Khristan ana Delta state nung tepseta liasü, ta osang ajanga ashir.

Northeast Nigeria nung Christ Nation International indang Pastor Jerry Hinjari ya Yola, Adamawa state nung par kidang nungi January 25 aonung ayatirm nung pua bener ao aser tasüngji lenmang tezülen pa indang tasümgang angu.

Pa tepseter ya mejangja saka iba region nung Islamic State West Africa Province (ISWAP) züngsemtem kanga yakyaka lir aser parnok dak temolung malemer.

"Pastor Jerry Hinjari ya January 25 nü pua bener ao aser pa tasümgang tasüngji angu. Commissioner of police, Sikiru Akande-i bushisüngdangtsü tuyuogo. Mapa tamajung inyaker nem obendang agütsütsü state nung aliba nüburtem dang nangzükur," ta Adamawa State Police

Command indang odongtar Yahaya Nguroje-i sangdong ka nung ashi.

Yangji alir Khristanpur aikati Morning Star News dang pastor asüba osang text message ajanga shia liasü.

Yangji alir Elijah Sambo-i ashiba agi, Pastor Hinjari asüba ajanga Yola Christian kin aoksaogo.

"Pai Tsüngrem mapa temeim nung tenzük, dangar asoshi aria bilemba nisung ka liasü aser pai Tsüngrem aser nübur tenzükba ajaki junga meteta lir," ta Sambo-i ashi.

Pastor Chingtok Ishaku-i tashi meshia sarasadem.

"Ibai yipru tesashi aitba mapang lir. Parnoki Pastor Jerry Hinjari pua bener ao aser temenen taka agi tepset. Kibur nai onok sarasadem langzüang, talisa par kibong nem anisüngzük aser tashi agüjang," ta Pastor Ishaku-i ashi.

"Putir Jerry Hinjari tepsetba ajanga temolung shirangba makoker. Pa asüba ya Nigeria northeast region nung Body of Christ asoshi takoksa tulu lir. Pa tepsetba ya onok ajak asoshi

taoksatsü osang ka lir. Pai rara tajung raraogo aser Yisu sülen anidaker jenti anidenogo," ta Trixyl Gofa-i ashi.

Nigeria indang Delta region nung Fulani kiset shiruru metsürtemi taoba hopta Khristan ana tepset aser ano kar pua bener ya yirutsü, ta yangji alirtemi ashi.

Delta state kübok Patani County nung aliba Toru-Angiama yimtsüng nung police temi ashiba agi, January 23 nü mejangjaba nisung kari Khristan ana tepset, ka dak injang khalokja yirutsü aser kar pua bener ao.

"Iba tesem nungi nisung tasümgang ana ngutetogo aser ka mozü kidang lir. Kiralongrar temi pua bener aortem kumzüktsü meranga inyakba mapang lir. Onoki iba lendong atalokba bushisüngdangba mapang lir," ta Delta State Police Command indang odongtar Bright Edefe-i Morning Star News dang ashi.

Yangji alirtemi ashiba agi, lendong agütsür ya Fulani shirur metsürtem aser asürtem ya tebu aser tanur ka lir.

Shiruru metsürtemi khaseter ya ka Egbejule aser ka par jabaso lir, ta yangji Khristan lenir Andrew Ekiyor-i ashi.

"Parnok ya alu nung mapa inyakba mapang lendong ya atalok. Shiruru metsürtemi Khristan ana tepsetba kisüng masü saka parnok indang shiruru tem asür Khristan ana indang alu nungi meindoka alu raksatsü," ta Ekiyor-i ashi.

Yirur alisang jena arua yimer yimsanger dang lendong atalokba osang agütsü, ta pai ashi.

"Pa mozü kidang anir oa prangbong agi yirua aliba anepaluba mapang lir. Yirur jena arusangi ozü yimtsüng nungi Khristanpur kar pua bener aoba osang ya agütsü aser parnok tang tashi pua lir," ta pai ashi.

Yangji alir Malati Wariebi-i ashiba agi, Fulani shiruru metsürtemi Toru-Agiama ta sür Khristanpur aliba yimtsüng ka amak aser iba mapang nisung ka aser par jabaso ka tepset aser iba lendong ya January 23 anepdang 11:00 ako (par mapang) meta atalok.

Alima nung tamagba yimsü

mechi 2022 küm Khristanpur timba tepsetba linükji Nigeria ya lir, kong taoba küm nisung 5,014 tepset, ta Open Doors' 2023 World Watch List report ajanga ashir.

Ajidang masü Khristanpur pua bener aoba (4,726), tashiyim amshia shi nung medemba/medemtsü merangba mesüra merenshiba, tashiyim agi kibong akumba amala timba lir aser tamangba yimsü mechi ki aser shishilempaba tesem raksatsüba timba lir.

2023 World Watch List nung Khristan ka alitsü linük tamajungtiba rongnung Nigeria ya jenjang trok buba nung lir, shirnok taoba küm jenjang tenet buba nung liasü.

Muslim Fulani nunger ya million aika lir aser parnok ya Nigeria aser Sahel nung sünga lir. Parnok ya kin kidong noklang aika nungi lir aser item rongnung kari Islam yimsü taroktiba nung amanga amshir, ta United Kingdom indang All-Party Parliamentary Group for International Freedom or Belief (APPG) ajanga tawa sangdong ka nung ashi.

AO OSHI ANGAZÜKDAK:

TANÜ ANGAZÜKTSÜBA OJANG



Olaosüng

(n) osangtsüsang (news)

* Tanü asüng asen lima **olaosüng** tajungbo masü.

Osangtajung

(n) Tsüngrem temeim agi kümzükba osang, tepelatsü osang (gospel/good news)

* Tasen Laishiba nung **osangtajung** indang shia lir.

OLONG PAITEP # 6415

Grid for crossword puzzle #6415 with numbers 1-15 indicating starting positions.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushilet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _ _ _ _ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _ _ _ _ _ kibur - (5)
13. Tebur tembar tsüngda jatepba - (4)

OLONG PAITEP # 6414 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.



2023 JANUARY ITA LILI RESULT !

January ita nung Lili tajungtiba (First) shimteta tanü yangi lepshia agütsür. Lili zülur-i February 10, 2023 tashi nung Tir Yimyim Office nungi senpet agizüksü mepishia metetdaksür.

ALOKBA JEPYA LIA SOBANGBA AJURUR

- Sobangba : Aree Temba, kechiba ajeper?
Alokba : Poh poh, ozü tantsü küna ita ka o mejembiteptsü, pei pei molungba inyaksü nangzüktepa agi ni ajeper aja, poh poh.
Sobangba : Waa maja, tanü nungi ita kaji tanzüker asü koda?
Alokba : Masü masü, ita kaji tanü tembanger, poh poh!
Sobangba : Oh Alokba!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meghalaya nung Lyngdoh adianutsürtemi nominations asü



Lyngdoh adianutsür ana- Ampareen aser Jasmine nati Meghalaya Assembly Elections atema Shillong nung nominations file asüba noksa nung angur.

Shillong, January 31, 2023

(Agencies): Lyngdoh adianutsür ana- Ampareen aser Jasmine nati Meghalaya Assembly Elections atema Shillong nung nominations sügo.

Ampareen Lyngdoh'er kibong mezüngbuba anogo nungsa nominations süa arur aser iba jagi lai tanü la tenüng

agütsü.

Ampareen-i kümsük pezüben atema East Shillong Constituency nungi tokteptsü. Taküm election nung lai NPP ticket amer tokteptü.

La tenu Jasmine-i Nongthymmai constituency nungi tang mezüng atema tokteptsü.

Meghalaya Assembly Elections atema nominations agütsüba anogo tatemangji February 7 lir aser February 27 nü polling asütsü.

Shillong nung aliba Deputy Commissioner indang Office nung adianutsür anati nominations atema aodang kinungertem aser pusemertemi tena meina ao.

Nongthymmai nungi NPP candidate Jasmine M Lyngdoh-i TMC MLA Charles Pyngrope aser UDP Iennir Jemino Mawthoh na den tokteptsü.

Mylliem constituency nungi Pynshai Manik Syiem-i independent candidate ka ama nomination sügo. Taoba election nung Syiem-i Mawphlang constituency nungi HSPDP party ticket amer toktep saka asür SK Sunn-i pa madak takok ngua liasü.

Meghalaya nung NPP züngsem 700 temi BJP nung aden

Shillong, January 31, 2023

(Agencies): Ranikor nungi National People's Party (NPP) züngsem 700 tema Bharatiya Janata Party (BJP) nung denogo.

Ranikor nungi kümsük punguben tashi MLA aser NPP candidate Martin M Danggo-i Bharatiya Janata Party (BJP) nung adentsü tebilemba lir.

Yashi BJP lennirtemi NPP züngsemtem pelashishia agizük.

Danggo-i ashiba agia pa pusemertem aser lennirtemi

Shillong Club nung pa den ajurutep aser idangji NPP toktsür BJP nung adentsü lemtet.

Ni BJP nung adentsü madentsü ashitsü makok kechiyong ni pusemertem aser lennirtem nungi osang kecha mali, ta paisa ashi.

"Lennirtemi kü nem takok ngudaktsünüra parnoki meranga inyaksüla" ta Danggo-isa ashi.

"2018 nung ni MLA menden yutsüba atema sasaa mebilemer kechiyong ozü area nung Civil

Subdivision ka lapoktsübaji kü indang alizüng liasü. Ni menden toktsüba agi ni ibaji ajangetogo. Ni MLA meinyaknür aser election nung shilem maginür, saka ozü lennirtem aser ni pusemertemi ano election nung tokteptsü rongshir" ta paisa metetdaksü.

Congress, AITC aser tanga party temi kü dangi aruogo saka ozü lennirtem aser pusemertemi kü den adentsü ta menangzükra ni meinyaktsü, ta Danggo-isa shisem.

Manipur kübok Moreh nung Myanmar nunger 4 apu

Imphal, January 31, 2023

(Agencies): Indo-Myanmar arrtsü anasa Manipur kübok Moreh nung police-i Myanmar nunger pezü apu.

Parnok ajak ya tesem balala nung apu aser parnok züngsema tesüiba hopta ka tsüngda Myanmar senso 86 puogo.

Moreh Polic station, Moreh

police Commandos, Moreh police special commandos aser India Reserved Battalion-i mita aodang tesem balala nung Myanmar nunger pezüji apu.

Parnoki Nepali Basti, Moreh, T Minou aser J Munnomjang nung mita ao aser kulikaket tejangja makai India-i arur Myanmar nungertem apu.

Parnok ajak Imphal-i anir aruogo aser Chief Judicial Magistrate, Tengenoupal tsüngdangi anir ao.

January 27, 2-23 nü Tengenoupal district police-ia Myanmar nunger 81 apu. Parnok ya Moreh sub-division kübok Lhangcham aser T Motha yimtsüngtem nung ozüng alema liyonga aruya liasü.

MNF-i Centre indang Uniform Civil Code magizüker

Aizawl, January 31, 2023

(Agencies): Centre sorkari Uniform Civil Code (UCC) benoktsü merangba magizüker ta Mizo National Front (MNF) Legislature party-i metetdaksüogo.

Chief minister Zoramthanga menden ser MNF legislature

party senden amendang taruba budget session nung UCC anema bangzüng ka renemtsü lemtet.

Senden nungsa Lawngtlai east assembly constituency MLA H. Biakzauva nem assembly deputy speaker inyakdaksütsü atema lemtet.

February 8, 2023 nü deputy speaker indang election agitsü lir.

MNF legislature party senden nung Socio-Economic Development Policy (SEDP) kübok kibong 60,000 nem mezüngbuba instalment atema Rs. 25,000 agütsüogo ta metetdaksü.



14th Nagaland Legislative Assembly Election nung 24th Angetyongpang Assembly Constituency nungi tokteptsü aliba Tongpang Ozüküm, Ex- Minister dak Naga nunger aser Constituency neburtem tenzüksü mangdang tulu ngua Süngkomen, Tongdentsüyong aser Alempang Ward asem nung aliba Mongsenyimti senso, anükapang aser tetsü tamo temi Tsüngrem dang temoatsü leniba teyari meshia January 31, 2023 nü sarasademtsüba mapang ka agia liasü.

"NISUNG KATI PEI TEMBARTEM ASOSHI PEI TAKUM AGÜTSÜBA DANG NUNGI TULUBA TEMEIMJI SHINGA DAKA MELIKA" Yohan 15:13

ASO : 09.05.1942 - ASÜ : 18.01.2023

Onoki teti meima aliba walunir **Asür Watinungsang Pongener**, Ex-Chairman (Kosasanger Putu) aser Head G.B, Chuchuyimlang village, iba lima nungi pila aoba mapang onok asoshi sarasademja, temeim sayua yariteper ajak dang kinunger tenüng nung pelaba lemsateper.

Nenoki temeim sayuba onok molung aser sarasadem nung teti alitsü.

Item dang alakteta pelaba lemsateper:

1. Chuchuyimlang Rionsanger Putu
2. Kosasanger Putu, Chuchuyimlang
3. Chuchuyimlang G.B Telongjem
4. Kosasanger 3 Buba Sungpo Zunga, Chuchuyimlang
5. Imlang Mopu, Chuchuyimlang
6. Teyong Mopu, Chuchuyimlang
7. Imkonglemba Aso, Chuchuyimlang
8. Imkonglemba Asotsür, Dimapur
9. Shri Tongpang Ozukum, Minister PWD (Housing& Mechanical)
10. Shri Amen Yaden, Hon'ble MLA
11. Nuklutoshi (Ex.MLA)
12. Ao Student's Union, Guwahati
13. Longsa Teka Pongen Kidong
14. Ungma Impang Pongener Kidong
15. Yachem Village Council
16. Yaongyimchen Village Council
17. Longsing Village Council
18. Yaongyimti Village Council
19. Yaongyimti Village Council
20. Salulemang Village Council
21. Mongsenyimti Village Council
22. Chuchuyimlang Town Baptist Arogo
23. Chuchuyimlang Baptist Arogo

Temeim kinungtsü, chirnur, semchir aser kinungertem.



SÜR KÜM KA ABENSAR MAMATETBA TSÜRABUR Asür. Limayanger

Oba, pungmang ka medem nai onok toktsür orr küm abensa aruaka na onok den ali ama bilemer aser onok mulungjang nung na teti lir.

Temeim kinungtsü, jala jabaso aser semchirsemmurtem.



भारतीय जनता पार्टी



BHARATIYA JANATA PARTY

22 ARKAKONG MANDAL

Date : 30/01/2023

CLARIFICATION

With regards to the letter written by Mr. S. Maong Lkr. and Mr. Satemyanger on 28-01-2023, we would like to make some clarification which are mention below.

1. Firstly, Mr. S. Maong Lkr has already been impeached from the party for having been indulge in the anti-party activities on 28th Nov. 2022 through a letter date 28.11.2022 which is attached below.
2. Secondly, Mr. Satemyanger and Mr. Sakulemba who claimed themselves as General Secretary 22nd AC Mandal and V/P 22nd AC Mandal respectively, were removed from the party by Mr. S. Maong Lkr himself during his tenure as BJP President 22nd AC Mandal.
3. Thirdly, since Mr. S. Maong Lkr and Mr. Satemyanger has misused the BJP Party writing pad without having any constitutional rights, they shall be called upon by the esteemed party office for further disciplinary action against them.

These are the present 22nd Arkakong AC Mandal

Office Bearers :

- | | |
|-------------------------|--------------------------------|
| 1. President | - Moakumzuk - 8787709282 |
| 2. Vice President | - Jongpong Pongen - 8787884531 |
| 3. Vice President | - Sentiyanger |
| 4. Vice President | - Tongpang - 9612316613 |
| 5. General Secretary | - R. Tali Imsong - 8974850988 |
| 6. Secretary | - Bendangnungsang - 9862042016 |
| 7. Secretary | - Limaba Imsong |
| 8. Secretary | - Talimenla |
| 9. Secretary | - Takoyangla |
| 10. Treasure Cum Office | - Imkongakum - 8732856189 |

MOAKUMZUK
PRESIDENT

22nd Arkakong AC Mandal
President
Bharatiya Janata Party
22 Arkakong A/C (Mandal)

Tali

R.TALI IMSONG

GENERAL SECRETARY
Secretary
22nd Arkakong AC Mandal
Bharatiya Janata Party
22 Arkakong A/C (Mandal)

भारतीय जनता पार्टी



BHARATIYA JANATA PARTY

22 ARKAKONG MANDAL

Date : 28/11/2022

OFFICE ORDER

This is to notify you that, the BJP 22nd Arkakong A/C Mandal Executive meeting was held on 28th November 2022 at the Treasurer resident wherein the house had deliberately discussed about the eventuality of Shri. Maongkaba Ex-President 22nd Arkakong A/C Mandal and found out that he is deem fit to expel from the party for several reasons such as indulging in anti party activities, issuing duplicate ID card, having alliance with other party without any knowledge of the BJP party, issuing fraud document representing as the President of 22nd Arkakong A/C Mandal and failing to explain his position basing on the Show Cause Notice issued on 15th November 2022. Therefore, having all these issues upon him, the 22nd Arkakong A/C Mandal executive on 28th November 2022 unanimously resolved to expel Shri. Maongkaba Ex. President from the party membership w.e.f, the date of this notification.

(MOAKUMZUK)

President

22nd Arkakong A/C Mandal

(R. TALI IMSONG)

G/Secretary

22nd Arkakong A/C Mandal

Putin-i missile agi amaktsü amokmeren: Boris Johnson



mangatetep kar liasü südi, ta Peskov-i ashi.

"Iba ojang yamaji angatet asünungbo iba tensa ya kanga jangratemtsüka masü," ta Peskov-i ashi.

Rara tenzüka aodang Johnson ya anüolen linüktem nungi Ukraine Tir Volodymyr Zelenskyy busemer rongnung tejangja ka akum.

Ajisüaka rara metenzükdang Putin dang Ukraine-i NATO nung adentsü tejangja mali aser rara tenzükra Russia arütsülen NATO tali akumtsü ta ashitsü temolung shirang, ta Johnson-i ashi.

Rara metenzükdang 2018 küm British nunger Salisbury yimti nung taoba mapang Russia nunger itdangiter Sergie Skripal nem miim agütsüba sülen Moscow aser London tsüngta tesendaktep tamajungba akum.

Tenüng menükja taitzüba ken o balala temai adokba sülen September ita ato kilonser menden nungi alusang Johnson-i London ya Kyiv indang tembar tajungtiba akumtsü meranga liasü.

Pa office nung alidang Kyiv ishíben semdang, Zelenskyy den mapang shia jembiba aser Ukraine nungertemi pa meima liasü.

Pai maneni temeim sayuba temaitsü taoba hopta ajungbena Kyiv semdanga liasü.

"Putin koma kera tsüngdir yamaji Ukraine aser alima asoshi tajungba asütsü," ta pai sangdong ka nung ashi.

London, Aenjeti/January 31 (Agencies): Ukraine amaktsü anasa phone nung jembidang Russia Tir Vladimir Putin-i missile amshia amaktsü amokmeren, ta taoba British Ato Kilonser Boris Johnson-i ashi.

Hombarnü sayatsü aliba documentary ka atema BBC den jembidang Johnson-i ashiba agi, Russia leniri pa dang NATO nung Ukraine adentsü indang asüngdang aser pai tangbo mataloktsü ta langzüa liasü.

"Küna jembidang pai ni amokmeren aser 'Boris, ni na mejashidaktsüner saka missile ka amshinung minute ka magitsü,' ta mesüra yamajika ashi," ta Johnson-i 2022 küm February ita jembiba bilemteta ashi aser iba sülen pai Kyiv semdanga liasü.

"Ajisüaka pa nem jembishinü kadaktsütsü ni

merangba nung pai asayar ama ni bilem."

Süaka Kremlin-i yamaji matalok ta ashi.

Kremlin odongtar Dmitry Peskov-i anogoshi osangbener den jembiba mapang Johnson-i ashiba ya shidak masü mesüra 'tiazü o ka' ta ashi.

"Missile amshia amokmeren meliasü," ta Peskov-i ashi.

"Ibai asaa tiazü jembiba lir - anungji nai Johnson dang kechiba pai yamaji jembir ta asüngdangtsüla - mesüra ibai memeteti tiazü jembiba alitsü aser Putin-i pa den kechi indang jembir pai mangatet asütsü südi."

Putin-i Johnson dang Ukraine ya NATO nung denra, US mesüra NATO missile tem Russia indang arütsü anasa yutsüra minute ka tsüngta missile temi Moscow atongtsü ta rasaa ashi aser yangji

AR Shamator Battalion-i volleyball asayamung ayongzüka asaya



Dimapur, Aenjeti/January 31 (TYO): Saisapong nung senotsü intokba ya linük yangertsü atema lanurtem lenmang shidak nung aniba den saku lir ta tangatetba nung Assam rifles Shamator Battalion-i ITC Dan yimtsüng nung January 29 aser 30 nü volleyball asayamung ka ayongzüka asayaogo.

Iba asayamung nung Assam Rifles, IRB, ITC Dan, Upper Dan, Old Pangsha, New

Pangsha yimtsüng nungi lanur arishi küm 15 nungi 20 tsüngda alirtemi shilem agiogo.

Ajak senteper iba asayamung team 7-i shilem agia liasü.

Asayamung ayongertemi Administrative teyari agütsüba den asaya dang amshiba osetsüt balala agütsü.

Shamator Battalion-i lanurtem ajungkettsü nukjidong nung sentong tajung ayongzüka agiba ya iba tesem

nung aliba nüburtemi kanga pelashishia agizükogo, kechiyong parnok kanga kinük nung aliba ajanga tenüngdakba sabangtem peria monguteter.

Asayamung sentong ya Coy Cdr ITC Dan COB, 14 Assam Rifles-i o jembia tenzük. O jembiba mapang pai lanurtem dang, taküm nung saisapong ya koda tongtibang iba indang lemsatep. Iba asayamung ya Old Pangsha Team-i koka liasü.

2023 Badminton Asia Mixed Team Championships: India team Malaysia, UAE, Kazakhstan den asayatsü

Dubai, Aenjeti/January 31 (Agencies): Asia Mixed Team Championships 2023 nung India team Group B nung Malaysia, UAE, aser Kazakhstan den asayatsü.

Iba asayamung ya Dubai Exhibition Centre nung February 14 nungi 19 tashi asayatsü.

Iba asayamung nung Asia linük 17-i shilem agitsü aser asayamung atema fixture Mongolbarnü Dubai Sports Council nung yangluogo, kong India nung rongnungi nungtugu badminton asayar PV Sindhu tetushi tesemdang liasü.

Group A nung China, Korea, Singapore aser Uzbekistan. Group C nung Indonesia, Thailand, Bahrain, Syria aser Lebanon aser Group D nung Japan, Chinese Taipei,

Hong Kong aser Pakistan ta lemezüka lir.

Iba asayamung nung China, Japan, Indonesia, aser Malaysia ya top four seeded team tem asütsü. Team 17 prongla ya telok shia nung linük pezüzü küma telok pezü lemsar lir, kong parnok Round Robin format nung tokteptsü aser temaba jenjang nung tembangba team ana knockout stage-i aitsü.

Group asaya nung asaya shia kija asaya anana aser tarep asaya asemsem asayatsü. Group stage nung tie shia asaya ponguprongla asayatsü. Knockout stage nungbo asaya ponguprongla tembanga masayayonga takoker jangjara anenatoktsü.

Group Stage nung tatembangbuba asaya asayaba sülen knockout stage atema

fixture metetdaksütsü.

2017 küm iba asayamung mezüngbuba ayongzüka asayaba mapang India team quarterfinals nung tsükatok. Iba sülen 2019 küm asayaba mapangbo India team group stage ajanga masayatet. 2021 kumbo Covid-19 wara poktetba ajanga iba asayamung masayateti liasü.

India squad:

Men's singles: Lakshya Sen, HS Prannoy

Women's singles: PV Sindhu, Aakarshi Kashyap

Men's doubles: Satwiksairaj Ranikreddy/Chirag Shetty, Krishna Prasad Garga/Vishnuvardhan Goud P

Women's doubles: Treasa Jolly/Gayatri Gopichand, Ashwini Bhat/Shikha Gautam

Mixed doubles: Ishaan Bhatnagar/Tanisha Crasto.

Everton-i coach Frank Lampard mapa nungi anentsü

London, Aenjeti/January 31 (Agencies): Everton-i club manager Frank Lampard mapa nungi anentsüogo. Pai iba mapa agizüker küm ka majung tsüngda mapa nungi anentsüogo.

Lampard ya 2022 küm January ita Rafael Benitez melenas shim, saka Rafael-i mapa toktsüba mapang team ya point table nung jenjang 19buba nung liasü.

Everton kibur Farhad Moshiri-i taoba mapang yimjak nung Lampard pusema jembio. Ajisüaka West Ham nung tamakok anguba sülen Moshiri-i iba telemetba agitsüsa aküm, shiba ita 14 sülen mezüngbuba iba asaya reprangtsü asoshi arur liasü.

Lampard mapa nungi anentsüogo ta osang atokba

sülen Everton puri Hombarnü nikongtsütsü arishi küm 44 tain coach ya mapa nungi anentsüba osang jangjashija liasü.

"Frank Lampard-i senior men's first team manager mapa tanü toktsüogo ta Everton Football Club-i jangjashitsür," ta club sangdong ka ajanga metetdaksü.

"Everton nung ajaki Frank aser pa indang coaching staff tem dang kanga pelaba lemsataper.

"Frank aser par team-i bendanga agüja inyakba ya tatishitsü tajung ka, ajisüaka tawa club-i junga masayatetba aser league nung jenjang majungba ajanga iba telemetba ya agitsüsa aküm.

"Frank aser par team tarutsü nung takok nguyonga aotsü imlaja atar," ta club sangdong

ajanga metetdaksü.

Paul Tait aser Leighton Baines nati manager tasen ka meshim tashi club achayanga atatsü. Everton pur taruba asayaji February 4 nü Premier League nung temaba jenjang nung aliba teams Arsenal den asayatsü.

Everton coach mapa bener aliba mapang Lampard-i aniba team yagi asaya 44 nungi 12 dang koka liasü.

Taoba Burnley coach Sean Dyche, ex-Leeds coach Marcelo Bielsa aser West Ham indang taoba Everton manager David Moyes nung rongnung kati Lampard melentsü imlar.

Al-Ittihad coach Nuno Espirito Santo, taoba Wolves coach, aser ex-Everton striker Wayne Rooney nata iba mapa asoshi asadangdar.

India nung Men's Volleyball Club World Championships asayatsü

Aenjeti/January 31, 2023 (Agencies): Volleyball World & FIVB-i Mongolbarnü sangdong ka ajanga Prime Volleyball League den longjemer India nung Men's Club World Championships küm ana ayongzüka asayatsü ta metetdaksüogo.

Asayamung ayongzüka asayaba linük ka ama 2023 aser 2024 küm Prime Volleyball League akokba team ya iba asayamung nung India tenüng nungi asayatsü, kong parnok Italy, Brazil, Iran amala alima nung volleyball asaya nung temaba jenjang nung asayaba linüktem nungi team tem den asayatsü.

Iba asayamung ya 2023 küm December 6 nungi 10 tsüngda ayongzüka asayatsü. Iba asayamung koba yimti nung ayongzüka asayatsü iba indang osang mapang tatsü ka lir sangdongtsü ta kasa

sangdong ajanga metetdaksü. Iba asayamung ajanga alima nung volleyball asayar tajungtibatem India-i anir arutsü. India nunga 2022 küm Prime Volleyball League tenzükba sülen iba asaya kanga kara renloka odar.

Iba league mezüngbuba season nung India kija nunga TV viewership million 133 liasü aser digital platform tem nung fan million 84 dak tema liasü.

FIVB tir Ary S Graca F-i ashiba agi, "tang mezüngbuba alima nung tebur volleyball asaya tajungtiba India-i bener arutsü FIVB yongya atar. Asayamung ayongzüka asayaba linük densema alima ajunga nungi temaba jenjang nung asayaba club tem iba asayamung nung shilem agitsü aser iba ajanga India aser alima ajunga nung fan tem jangrademdaksütsü."

Jorginho alizüktsü atema Arsenal aser Chelsea na mulungtepogo



Aenjeti/January 31, 2023 (Agencies): Chelsea nungi Italy nung midfielder Jorginho pound million 12 agi alizüktsü atema Arsenal-i mulunga agizükogo.

Arishi küm 31 tain asayar shiba 2014 küm Napoli nungi Chelsea-i arua aden, pa Stamford Bridge nung tenangzüktepba yanglur aliba tembangtsü asoshi ita trok dang anunga liasü.

Pa den ita 18 atema tenangzüktepba ka meyanglu tsüngda tamasa pa temang tendangtsü. Tenangzüktepba yangluba nung pa ano küm ka talila asayatsü atema tenangzüktepba yanglutsü lenmang lapoka yuogo.

Brighton nungi Moises Caicedo alizüktsü atema anaben tashi merandangba sülen Gunners puri Jorginho alizüktsü atema telemetba agia liasü.

Brighton-i Caicedo ya ayoktsü atema masü ta shiogo aser Mongolbar aonung 11:00 ako nung deadline tembangba sülena Ecuador nung midfielder ya Brighton nungsa

alitsü tejangjaba kümogo.

Jorginho ya January window nung Arsenal-i alizükba asayar tasembuba asütsü. Arsenal-i taoba mapang Spezia nungi euro million 20 agi Poland nung defender Jakub Kiwior alizük aser Belgium nung striker Leandro Trossard, Brighton nungi pound million 21 agi alizükogo.

Mikel Arteta-i aniba team ya Premier League nung tanabuba jenjang nung aliba team dang nungi point pongu agi timba lir.

Chelsea nungi 213 asayaba mapang Jorginho-i goal 29 idaktüogo aser club den pai Champions League, Europa League, Uefa Super Cup aser Fifa Club World Cup dena kokogo.

Pa Brazil nung aso saka arishi küm 15 asüdag Italy-i ao aser international jenjang nung Italy nungi asayatsü atema telemetba agia liasü.

Pa Italy national team nungi 46 ben asayaogo aser 2021 küm July ita Wembley nung 2020 Euro final nung England akokba team nung densema liasü.

BILEMDANGANG

"Pela alidanga tenüngsang agütsütsü tamatok."